

**Sisa Lynas dibuang jauh – PM
Utusan Online
03 Mac, 2012
Oleh YULPISMAN ASLI**

KOTA BHARU 2 Mac - Kerajaan meminta Lynas Malaysia Sdn. Bhd. memindahkan sisa atau buangan industri yang dihasilkan daripada perusahaannya ke lokasi yang jauh dari penempatan penduduk.

Perdana Menteri, Datuk Seri Najib Tun Razak berkata, keputusan itu dibuat kerana kerajaan prihatin dengan kebimbangan penduduk berdekatan walaupun saintis dan pakar tempatan serta antarabangsa mengesahkan operasi syarikat itu dan buangan industri yang dihasilkan adalah selamat.

Beliau turut menolak andaian kononnya keputusan itu dibuat kerana kerajaan menerima tekanan daripada pihak tertentu.

"Kita mahu rakyat berasa selamat. Kita sudah analisis perkara itu dan mendapati penyelesaian tersebut terbahagi kepada dua iaitu, satu asas kepada saintifik dan satu lagi soal emosi serta psikologi.

"Bagi soal bukti saintifik, sudah ada macam-macam badan bebas, saintis dan badan antarabangsa yang telah mengesahkan Lynas termasuk buangan industri daripada Lynas memang selamat.

"Tetapi oleh kerana masih ada yang tidak berpuas hati, kita dapati itu soal emosi dan psikologi ditambah dengan ada pihak yang cuba mengeksploitasi isu tersebut. Jadi kita ambil keputusan minta Lynas memindahkan buangan industri mereka ke tempat jauh daripada penduduk di sekitar tapak Lynas," katanya.

Beliau berkata demikian kepada pemberita selepas menghadiri Majlis Pemimpin Bersama Rakyat dan Ramah Mesra Bersama Profesional Kelantan di Kompleks Sekolah-Sekolah Wakaf Mek Zainab di sini hari ini.

Hadir sama, Menteri Perdagangan Antarabangsa dan Industri, Datuk Seri Mustapa Mohamed; Menteri Pelancongan yang juga Pengerusi MCA negeri, Datuk Seri Dr. Ng Yen Yen; Timbalan Menteri Kewangan, Datuk Dr. Awang Adek Hussin; Setiausaha Usaha Kerajaan Negeri, Datuk Dr. Zainuddin Ibrahim; Pengarah Jabatan Pembangunan Persekutuan Kelantan, Datuk Makhatar Mustapha dan Presiden Peneraju Profesional Kelantan (Kelpro), Nor Azli Ahamed.

Mengulas lanjut, Perdana Menteri menjelaskan, kerajaan bagaimanapun belum memutuskan lokasi baru buangan industri daripada syarikat yang beroperasi di Gebeng, Kuantan itu.

"Lynas tetap di situ, tetapi buangan industri akan dipindahkan ke kawasan lebih jauh," jelas beliau.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0303&pub=Utusan_Malaysia&sec=Dalam_Negeri&pg=dn_01.htm